

# Tuns da cool girl

11avel Top Pop Rumantsch

■ (cp) «Laschar ir» – quai è il titel dal indeschavel Top Pop Rumantsch. Scrit ed interpretà da Bianca Mayer, musicista universal da Scuol. D'udir exclusiv al Radio Rumantsch. Bianca Mayer nun è il tip da las emoziuns stravagantas, ella è ni l'animal dal palc ni la dultschinea cun arias da musicstar. Quai na munta dentant ch'ella nun amia la musica, anzi, Bianca viva la musica di per di. E quai en ina varietad nunditga, ella è buna da sunar la bunura orgels en baselgia e la saira batteria en in tschaler da rock, ella scriva oz soundtracks per films e maina damaun lavuratoris per bands novizas, e quai pendulond sco ina furmicla tranter Scuol e Turitg. Ma tut quai fa ella senza tutgar ils sains gronds. Ed en quest purtret quadra detg bain la chanzun che Bianca Mayer ha proponì per la retscha dal Top Pop Rumantsch – ina chanzun suttemprada, tecnoida, che trai endament cun sia ritmica renitenta e sia melodia circulara ils megliers onns dals Depeche Mode. E tut questa «coolness» be per zuppentar in vag mal d'amur, in mal da la vita, in temp che na vul passar. E per exprimer la finala la brama da simplamain pudair «laschar ir».

*laschar ir*

*las uras nu passan  
cur chi vessan da passar  
cur chi nu füss da stübgjar e simplamaing far  
ma nu's riva davent  
e mincha secunda arda  
sco auoglias tras e tras*



Bianca Mayer è la cumponista e chantadura da l'indeschavel Top Pop Rumantsch.

MAD

*ün cumbat tanter tai e l'eternità*

*ref:  
less ir davent da quia  
inclur bel e chodin  
ingiò ch'ingün impissamaint po tradir  
ch'eu sun vi dal patir  
e na buna da laschar ir  
eir sch'aint la creppa esa cler  
meis cour resta creppun*

*chi'm vegn a dar ün schleppun*

*ch'eu poss star sü ed ir  
quant lönych as poja esser debel  
stüppid e curius?  
e na trar üna decisiun  
per quai chi füss bun  
perche la forza füss adüna quia  
cul temp vegna melder  
ma il temp nu vuol passar..*

Bianca Mayer è naschida a Scuol e creschida si là en in ambient fitg musical; suenter la matura ha ella studegià clava-

zin al conservatori da Turitg, enritgond ils studis cun uras da jazz. Sia emprima band ha ella gi cun 16 onns; oz suna ella la batteria en in trio da dunnas. Il 2003 ha Bianca participà a l'entupada musicala rumantscha-valisica «Cara», e tranter sias lavurs recentas figurescha l'assistenza al soundtrack dal film «Vitus» da Fredi Murer. Sper las lecziuns da clavazin dat Bianca Mayer er workshops per bands. Dacurt ha ella scrit ina chanzun per il quartet vocalic ladin 4 For You.